



Kursus Sembelihan dapat sambutan menggalakkan

Buat julung kalinya, Universiti Malaysia Pahang (UMP) telah berjaya menganjurkan Kursus Sembelihan yang telah dihadiri seramai 60 peserta yang terdiri daripada para pelajar dan staf UMP yang diadakan di perkarangan Masjid UMP pada 9 November 2010 yang lalu.

Kursus sehari itu bertujuan untuk memberi tunjuk ajar cara sembelihan yang betul dengan membekalkan sebanyak 50 ekor ayam dan seekor kambing yang disediakan untuk memberi peluang kepada setiap peserta kursus mempraktikkan sendiri cara penyembelihan haiwan tersebut mengikut syariat yang telah ditetapkan dalam Islam.

Selain itu, para peserta juga digalakkan supaya berpuasa sunat supaya dapat menikmati juadah berbuka puasa di Masjid UMP dengan hasil sembelihan mereka pada hari tersebut.

Menurut Pengarah Pusat Islam & Pembangunan Insan (PIPI), Dr. Hasan Ahmad, pihaknya berbesar hati

menganjurkan program seumpama ini dalam mendidik generasi baharu hari ini supaya lebih berkeyakinan dan berani dalam melakukan kerja penyembelihan mengikut kaedah yang betul dan menepati syariah Islam supaya hasil sembelihan itu halal untuk dimakan.

“Bagi menjayakan kursus ini juga, PIPI telah menjemput Mohamad Hilmi Mat Said, pensyarah Pusat Bahasa Moden & Sains Kemanusiaan (PBMSK) untuk memimpin program ini sepanjang ia diadakan dengan kerjasama Sahabat Masjid (SAHAM), Perwakilan Mahasiswa Kolej Kediaman 2 (Peka 2) dan Biro Kerohanian Surau Kolej Kediaman 2,” katanya.

Manakala menurut Pembantu Tadbir (P/O), Pejabat Naib Canselor, Syed Mohd Hafidz Syed Hussin, ternyata program seumpama ini sangat bermakna sekali buat warga kerja UMP dalam menjalinkan hubungan yang murni serta dapat memberi keinsafan dan kesedaran dalam menjalani ibadah korban apatah lagi kita bakal menyambut perayaan Aidiladha yang bakal tiba.

“.....mendidik generasi baharu hari ini supaya lebih berkeyakinan dan berani dalam melakukan kerja penyembelihan mengikut kaedah yang betul dan menepati syariah Islam supaya hasil sembelihan itu halal untuk dimakan.”